

**Derewel ana Pol sə vinden ayak anà  
đo sə  
Kolosiya ahay  
Adakay way pə deftere a anan**

Sa đaf Egliz à wulen su doh sə Kolosiya nà, Epafəras. A alay ana Pol sə vinde đerewel a anan nà, tinen à dangay maya tə Epafəras. A đakan atan anan nà, Yesu Almasihu winen bahay a pa nga sə way ahay fok, aday a đakan atan anan azla a tinen à təra kawa su do mə japay a tə Yesu Almasihu ataya awan. Matanan, adaf nga pə Yesu a zalay asan way sə daliyugo ahay fok, tē pərahan azar anà atətak way ataya bay.

*Nga sa 'am ahay*

Yesu winen bahay a pa nga sə way ahay fok (1.1-23)

Yesu nà, way a Mbərom mi đer awan (1.24 - 2.5)

Anjahay wiya mbala do a Yesu Almasihu ahay (2.6 - 4.6)

Andav sa 'am ahay (4.7-18)

*Pol a jan ayak 'am anà Kolosiya ahay*

<sup>1</sup> Sə vindek ikwen ayak đerewel a anan nà, nen Pol, nen do ana Mbərom sə ngaman aday sə təra anan do maslan ana Yesu Almasihu ata awan. Derewel a anan a zlak ayak nà, à alay a manay wa tə Timote mərak a mənuko ata awan. <sup>2</sup> Mə vindek ikwen ayak anà kwanay do a Yesu ahay à Kolosiya, kwanay mərak a manay ahay, mə japay aya tə Yesu

Almasihu. Mbərom Bəbay a mənuko â gak ikwen sumor aday â varak ikwen zay anahan.

*Pol a ngəran anà Mbərom anga do sə Kolosiya ahay*

<sup>3</sup> A alay a wura wura, manay apan mi ga amboh anga kwanay cəna, mə mbədək anan à nga wa sə ngəran anà Mbərom anga kwanay bay re. <sup>4</sup> Mə ngəran anga mə slənek kwanay nà, kə təmihen Yesu Almasihu à mivel a kwanay inde tə dīdek awan, aday kwanay apan ki gen anan asan zek anà do a Yesu ahay re. <sup>5</sup> Ki gen matanan nà, anga kə sənən zle Mbərom kə lavak ikwen anan zek tə way lele aya à mburom à man anahan awan. Aday kwanay apan ki dəfen anan ide à way a kwanay saa njad anan mba ata awan. Kə sənən pə way a Mbərom a sə lavak ikwen anan zek ata nà, kurre à alay a kwanay sə sləne ləbara mugom a sa 'am dīdek a ata awan. <sup>6</sup> Ləbara sa 'am a mugom ata nà, kà tak 'am pə daliyugo kwa aha fok. Kə tərak nà, kawa sé aday winen apan i har, a wahay wan bayak a ata awan. Natiya, 'am a Mbərom winen apan i zəga sa zla pa 'am pa 'am à wulen a kwanay inde dukwen matanan re. A dazlan sə zəga sa zla pa 'am pa 'am à wulen a kwanay, à alay a kwanay a sə sləne Mbərom kə gak ikwen sumor acəkan ata awan. <sup>7</sup> Sə dəkək ikwen anan ləbara sa 'am a mugom ata nà, Epafəras, car a manay i mer su way a Yesu Almasihu inde. Winen a ga mer su way a Yesu Almasihu nà, tə mivel kərtek awan. Winen apan i ga mer su way a Yesu àga kwanay à yime a manay inde. <sup>8</sup> Epafəras ata nà, kə dəkək umo anan mer su way anà Apasay a Mbərom sə varak ikwen məgala sə pəlay mərak ahay ata awan.

<sup>9</sup> Anga nan kutok, a ban kwa pə ana manay sə sləne ləbara a kwanay ata wa nà, manay mə mbəsakak sa gan amboh anà Mbərom anga kwanay bay hwiya. Ma gan amboh nà, anga aday kə sənen way anahan sa gan may, aday á varak ikwen kəlire\* tə asan way tə məgala sə Apasay anahan. <sup>10</sup> Natiya tə kəlire sə asan way ata kutok, anjahay a kwanay i zlan à nga anà Bahay a mənuko, ki gen way anahan sa gan may ahay fok, aday ki gen mer su way lele aya cara cara. Ata asan way a kwanay pə Mbərom i zəga nə pa 'am pa 'am. <sup>11</sup> Ma gan amboh anà Mbərom dukwen, anga aday á varak ikwen məgala sə mazlaḅ anahan sə jəra njəjan, aday sə səmen anà way ahay fok tə ataslay mivel awan. <sup>12</sup> Matanan, ngəren anà Bəbay Mbərom anga kə varak ikwen cəved sa njad magwagway anahan sə lavan a zek a anà do anahan ahay à mburom à man jiyjay a inde ata awan. <sup>13</sup> Mbərom kə təmak ahay mənuko à alay a məgala ana bahay sə idə zənzen a wa, aday a pak mənuko à man sə bahay a wan anahan ləliwe ata awan. <sup>14</sup> Sə təmay ahay mənuko à alay ana Fakalaw wa nə, wan a Mbərom, anga kə pəsek uko anan ines a nuko ahay.

*Yesu Almasihu nà, Bahay sə lavan nga anà way ahay fok*

<sup>15</sup> Mbərom nà, kula dovan kə canak anan tə idə bay. Əna Yesu Almasihu dovan a mezeze a Mbərom ata kə kak uko anan ahay Mbərom awan. Yesu a nà, winen murkwaya sa wan a Mbərom

---

\* **1:9** Kəlire a anan nà, madan bay, əna asan way ana Apasay a Mbərom.

ahay. A lavan nga anà way a Mbərom mə ndakay aya kəzlek jiga fok. <sup>16</sup> Mbərom a ndakay way ahay fok nə tə alay a wan anahan ata awan, kwa â ga nə pə daliyugo, kwa à mburom awan fok, kwa way aday də canan zle ataya, kwa way aday də canan bay ataya fok, kwa way tə məgala à mburom ataya awan, kwa maslay a Mbərom ahay tə bahay a tinen aya təke fok. Way ataya fok mə ndakay aya nə, tə alay a wan anahan ata awan, aday anà wan anahan ata re. <sup>17</sup> Winen nà, a lahan anà way ahay fok, aday way ataya ta ga inde dukwen, anga winen a re. <sup>18</sup> Winen nà, pa nga ana dō sə japay tə winen ahay fok, tinen zek anahan awan. Winen adazlan sə way ahay fok. Sa lah sə slabakay ahay à məkə wa mama'am nà, winen a re. Matanan kutok, winen kə lahak anan pa 'am ana way ahay fok. <sup>19</sup> Mazlaḅ sə way a à Mbərom a inde ata fok nà, inde à wan anahan ata matana re, anga a zlan à nga anà Mbərom a nə matana awan. <sup>20</sup> A nan à Mbərom a nà, way a mə ndakay ataya, kwa à mburom, kwa pə daliyugo fok, 'am â zlan atan pi zek tə winen nə tə mez ana wan anahan ata awan. Matanan kutok, zay inde à wulen a Mbərom tə dō ahay anga wan anahan ata awan, anga kə pəkak anan mez anahan, kə məcak pə dədom.

<sup>21</sup> Kwakwa ata nà, kwanay dəren dəren pi zek wa tə Mbərom, kə təren nà, dō manide anahan ahay, anga ki gen nə way lelibay aya awan. Abayak nga a kwanay dukwen, lelibay aya re. <sup>22</sup> Əna Yesu kə tərak dō zəzen awan, aday kə məcak anga kwanay. Matana həna kutok nà, Mbərom kə zlahak anan məlmal anahan tə kwanay, tə amac a wan anahan a ata awan. Natiya

kwanay kə tərən dō cəncan aya, aday ki mben apan sə tavay pa 'am a Mbərom mənjanəna ines aday dōwan i mba apan sa mak ikwen anan mungok sabay. <sup>23</sup> Natiya kutok, pərihen anan azar hwiya sa daf nga nà, pa 'am sə ləbara a mugom ata pac pac, kâ sa dagwiren wa bay fok. Tiven nà, njənan lele. Dəfen anan abayak nga a kwanay nà, dook pə ləbara sa 'am a mugom a mbala a kwanay a sə sləne kurre ata awan. Ləbara sa 'am ata dukwen, daliyugo kəzlek kə slənek anan fok coy re. Həna, nen Pol nà, Mbərom kə tərak nen dō si mer su way anahan, anga sə dəkay anan ləbara sa 'am a anan re.

*Mer su way a Pol sa ga anga dō a Yesu ahay*

<sup>24</sup> Həna nà, nen apan ni taslay anan mivəl tə dəce uno ahay sa ga anga kwanay ata awan. A alay ata nà, Yesu Almasihu a kâ sak dəce, matanan nen ni sa dəce anga dō anahan ahay tinen zek anahan ata awan. Na ga dəce matanan nà, anga aday mer su way anahan sə dazlan à mivəl a kwanay inde ataya à ndav wa. <sup>25</sup> Mbərom kə zəbək nen dō si mer su way anahan à wulen su dō anahan ahay wa. A gan may nà, nê dəkak ikwen anan ləbara sa 'am anahan mugom ata fok. <sup>26</sup> Kurre ata nà, ləbara sa 'am mugom ata nə mi dər awan, dōwan a san anan fan bay. Aya həna nà, Mbərom kə kak anan ahay uho anà dō anahan ahay kutok. <sup>27</sup> A nan anà Mbərom nà, dō anahan ahay pu kon pu kon fok tã san way anahan mi dər ata nà, winen lele aday tə mazlaḡ a re. Way a mi dər ata nà, Yesu Almasihu a à mivəl a kwanay inde ata awan. Tə winen awan, ki mben apan sa daf anan abayak nga a kwanay

dook pa man sə mazlaḅ anahan a aday ki sa njihen a uda ata awan.

<sup>28</sup> Anga nan, manay apan mi ḁakan anan anà ḁo ahay fok nà, Yesu Almasihu awan. Manay apan mi təkəren atan, manay apan mi jan atan panan fok nà, tə kəlire a Mbərom a sə varan umo ata awan. A nan umo jiya nà, ḁo məjapay aya tə Yesu Almasihu ahay fok tê təra nà, ḁo ma san nga aya pa 'am a Mbərom. <sup>29</sup> Nen apan ni rəzlen à nga wa sa ga mer su way ata tə məgala mbala Yesu Almasihu a ì nen inde nà, anga nan kutok. Sa ga mer su way a ì nen inde nà, məgala ata awan.

## 2

<sup>1</sup> U no nà, sənen apan lele, mer su way həna nen apan ni ga ata nà, ma da 'am awan. Na ga mer su way a ma da 'am ata nà, anga kwanay ḁo sə Kolosiya ahay, tu ḁo sə Lawdikiya ahay, aday ḁukwen, anga azar su ḁo kula tə canak uno fan bay ataya re. <sup>2</sup> Na ga matanan nà, anga sə varak ikwen məgala aday kê sənen zek à wulen a kwanay ahay inde, kê təren zek kərtek awan. Aday asa u no nà, kê njiden kəlire sa san ḁidek a Mbərom fok. Ata nà, ki sənen anan way a Mbərom a mi ḁer ata awan, kawa sa ja nà, Yesu Almasihu. <sup>3</sup> Kəlire tə asan way lele aya fok ḁi tan à nga nà, à Yesu Almasihu inde.

<sup>4</sup> Nə ḁakak ikwen anan ayak way a anaya nà, anga aday ḁowan à sa wurbasak ikwen awan saa njak kwanay tə wurwer sa 'am ahay bay. <sup>5</sup> Sənen apan lele re, kwa nen inde à wulen a kwanay ibay ḁəp nà, apasay uno inde tə kwanay. Nen apan ni taslay mivel tə mindel nà, anga nə sləne kwanay apan ki gen way tə cəved aya awan, aday adaf nga

a kwanay pə Yesu Almasihu nà, mə tavay a demer demer lele.

*Anjahay su do ana Yesu Almasihu ahay*

<sup>6</sup> Həna nà, kə təmihen Yesu Almasihu à mivel a kwanay inde winen nə bahay a kwanay a coy. Anga nan kutok, azla a kwanay nà, à təra kawa azla su do mə japay aya tə winen acəkan ataya awan. <sup>7</sup> Matanan, hen sləlay à winen inde lele, kawa sé sa pak anan sləlay anahan ahay à yugo inde lele ata awan. Həren à 'am anahan inde, adaf nga a kwanay pə winen à ga nə njənnjan kawa ana kwanay a sə tətək ata awan. Ngəren anà Mbərom bayək awan.

<sup>8</sup> Aya əna, sənen pi zek lele, bina do ahay ti i njak kwanay tə atətək way mungwalay aya, aday tə asan way kəriya aya awan. Aday cəkəbay asan way a tinen ataya nə asan way su do zənzen awan, kabay asan way sə apasay lelibay aya sə daliyugo a anan, bina asan way mbala Almasihu itəbay. Kə pəken anan sləmay anà atətək way a tinen ataya bay jiga awan, <sup>9</sup> anga anjahay a Mbərom fok nà, winen ĩ zek ana Yesu Almasihu inde. <sup>10</sup> Matanan həna, kwanay kə jipen tə winen a kutok ata nà, Apasay a Mbərom dukwen kə rahak à kwanay inde coy re. Anga Almasihu a nà, Bahay a pa nga sə way a tə məgala aya à mburom ata fok.

<sup>11</sup> Anga ajapay a kwanay tə winen ata nà, Mbərom kə gak pikwen mez anahan sə dakan anan anà do ahay kwanay nə do anahan ahay. Kwakwa ata a jan anà Yahuda ahay nà, tã gad mədəndalas anga tinen do anahan ahay. Aya kwanay həna kutok nà, Mbərom a a ga pikwen mez sə dakay anan nə kwanay do anahan ahay ite.

A ga way ata nə tə alay su dō bay, əna tə alay a wan anahan Yesu Almasihu awan. Winen kà rak ahay kwanay à anjahay a kwanay sə kwakwa lelibay ata wa coy. <sup>12</sup> A alay a kwanay sa ga baptisma ata nà, kə tərak kawa ta lak kwanay à məke inde pə kərtek a tatə Yesu Almasihu awan. Aday à alay a kwanay sa may ahay à 'am wa ata dükwen kə tərak kawa Mbərom a slabakay ahay kwanay à məke wa pə kərtek a tatə Yesu Almasihu a re. A təra matanan nà, anga kwanay kə dəfen apan nga, məgala a Mbərom inde sə slabakay ahay kwanay à məke wa kawa anahan sə slabakay anan ahay Yesu Almasihu à məke wa ata re.

<sup>13</sup> A alay ata nà, Mbərom a ca pikwen nà, kawa dō ma mac aya awan, anga kwanay nà, dō sa ga ines ahay, aday anga kə gak pikwen mez sə dəkay anan kwanay nə dō anahan ahay ata fan bay re. Aya həna kutok, Mbərom kə varak ikwen sifa tə Yesu Almasihu. Aday asa, winen kə pəsek uko anan ines a mənuko ahay fok re. <sup>14</sup> A alay ata nà, sariya a Mbərom kə bənak mənuko, anga də pərahak anan azar anà 'am anahan ma ja aya ata bay. Əna pə dəba anahan a wa nà, Mbərom kə ngərwak anan dərrewel a aday gudire sə ines a mənuko ahay mə vinde aya uda ata aday kə darak anan pə dədom a mə zləngad awan. Matanan sariya inde pukə sabay sə coy. <sup>15</sup> A alay a Yesu Almasihu sa mac pə dədom a mə zləngad ata nà, kə jakak anan alay pa nga anà məgala ana bahay sə setene ahay à bagəbaga mburom inde ata fok, kə mbak patan. Kə pəkak atan waray i ide pa 'am sə dō ahay fok re.

<sup>16</sup> Anga nan kutok, dōwan â sa mak ikwen anan



mungok pa 'am sə way sa pa, kabay pə way sa sa ahay bay. Matanan asa re, dōwan â sa mak ikwen anan mungok pa 'am sa ga azar uko pə ava pə ava ata bay, kabay pa 'am sa ga azar uko pə kiya pə kiya ata bay, kabay pa 'am sə dəfan apan anà luvon sa man uda ata bay jiga awan. <sup>17</sup> Way ataya fok nà, minje pə way saa nay ahay, bina dīdek sə way ataya fok nà, à Yesu Almasihu a inde. <sup>18</sup> Do ahay inde bayak awan tinen apan ti zluwe anan dō ahay ta sa ja nà, dō ahay tē nahay anan nga a tinen aday tē dəfan apan anà maslay a Mbərom ahay re. Tə varan zlangar anà cəen sə zūbay a tinen ahay ta sa ja nə Mbərom sa man atan anan ahay way ataya ĭ cəen sə zūbay inde. Ajalay nga a tinen aya nə pə way sə daliyugo a anan dəkdek. Matanan jəba su dō ataya nà, kâ sa bənen atan à 'am wa bay jiga awan, anga tinen dō sə həran nga ĭ zek ahay, dō sə kwecele ahay re. <sup>19</sup> Do ataya nà, tə mbəsakak sə japay tə Yesu Almasihu. Winen nga awan pu dō a Yesu ahay, aday hawal si zek ahay ta njad sə japay pi zek nà, anga nga ata awan. Dəmbazl si zek ahay tə japay atan pi zek aday a njad sa har tə alay a Mbərom kutok re.

<sup>20</sup> Həna kə sənen apan zle lele, kwanay nà, kə məcen pə kərtek a tə Yesu Almasihu coy. Anga nan, apasay sə daliyugo a anaya ti mba pikwen sabay. Ata nà, ki gen way ahay hwiya kawa kwanay dō sə daliyugo ahay nə angamaw? Abay ike kə dəfen anan apan anà 'am sə awan aya pərsləsle nà, angamaw? <sup>21</sup> 'Am kawa: «Kâ laman alay anà way a anan bay», «Kâ tukom way a anan bay», kabay «Kâ zəba anan way a anan bay» re. <sup>22</sup> Da jak dī dəfan apan anà way ataya cəna, da san zle,

ta nay à abayak nga su dō zənzen a wa dəkdek, way ataya fok ti lize. <sup>23</sup> Mama'am a nà, dō ahay tē bayak nà, atətak way ataya tē varan kəlire anà dō ahay, anga atətak way ataya ti gan bəlaray anà dō ahay sa ga pəra kawa sa zlan à nga anà dō ahay, sə nahay anan nga à məndak, aday sə kətah anan nga a tinen re. Aya əna, mer su way matanan ataya fok nà, i man zek anà dō ahay sə mbasay pi mer su way sə ubor si zek ahay bay re.

### 3

#### *Yesu Almasihu kə mbədhak ikwen anan anjahay*

<sup>1</sup> Kə sənən apan zle coy kwanay nà, kə slabiken ahay à məke wa tatə Yesu Almasihu fok. Anga nan kutok, dəfen anan abayak nga a kwanay nə dook pə way aya aday kwanay saa njad à mburom ata awan. Ki njiden anan nà, à man ana Yesu Almasihu, dōwan a mə njahay a tē day sə alay puway a Mbərom ata awan. <sup>2</sup> Matana awan, abayak nga a kwanay â ga nə dægacce pə way a à mburom ata awan, bina kə bayiken pə way sə daliyugo ahay bay. <sup>3</sup> Anga nan kutok, kə sənən apan zle, kwanay nà, kə məcen, aya əna Mbərom kə slabakak ahay kwanay à məke wa. Natiya kutok, sifa a kwanay inde wiya awan, winen mi der a à alay ana Yesu Almasihu inde pə cakay a Mbərom. <sup>4</sup> Tə didek a nà, Yesu Almasihu nə winen sifa a kwanay. Natiya, pə luvon a aday Yesu Almasihu a kà sak a sləray ahay ata nə kwanay dukwen ki sləren ahay nə tē winen awan, aday tē mazlaḅ anahan a re.

<sup>5</sup> Anga nan kutok, mbəsiken anjahay a kwanay lelibay ataya fok. Mbəsiken way kawa aján uho, aga way sə waray ahay, aga ubor pə way ma ga waray aya awan, tə way lelibay aya awan, aga idé pə way ahay. Bina ka sak i gen idé pə way ahay nà, ki dəfen anan apan kawa tinen mbərom ahay. Mbəsiken anan way ataya fok. <sup>6</sup> Anga mer su way a lelibay ataya fok, Mbərom i ga mivel pu dō sə dəfan apan bay ataya awan. <sup>7</sup> A alay ata nà, anjahay a kwanay a dukwen matana awan, ki gen ahay jəba si mer su way a lelibay ataya re.

<sup>8</sup> Aya həna kutok nà, mbəsiken way ataya fok: Kí gen mivel bay, awan â cəbak ikwen bay, kí gen anan way lelibay aya anà dō ahay bay, kâ si gen mənjelgek bay, kâ sa nəsən anan 'am anà dowan bay, <sup>9</sup> kâ sa gəden anan mungwalay i zek ahay bay, anga anjahay a kwanay lelibay a sə kwakwa ata nà, kə mbəsiken anan ti mer su way anahan aya təkə fok. <sup>10</sup> Həna Yesu Almasihu kə mbədəhak ikwen anan anjahay a kwanay wiya awan. Kawa kə pəken zana wiya a pi zek, kə tərən dō wiya aya coy. Dowan a kwanay wiya ata winen apan i zəga sə ndakay zek nə pac pac, anga aday kí gen minje tə Mbərom, dō sə ndakay kwanay ata awan. Natiya ki mben apan sa san anan Mbərom lele cərah kutok. <sup>11</sup> Anga nan kutok, həna nà, awan sə gəzla anan Yahuda ahay pi zek wa tu dō azar aya nà, ibay. Do ma gad mədəndalas aya awan, tu dō ma gad a bay aya fok, tinen nə kərtek. Do mə vəzle a bay aya awan, tu dō mə vəzle a bay a tə mindel ataya fok, tinen kərtek a re. Aday dō bile aya awan, tu dō bile aya bay ata awan, tinen kərtek a ca. Do ataya fok, awan kə gəzlak atan alay pi zek wa bay. Anga zek

ana Yesu Almasihu a nà, winen pa nga sà dō ahay fok, aday à mivel su dō anahan ahay inde fok re.

<sup>12</sup> Matanan, kwanay nà, kə taren dō a Mbərom ahay coy, a pəlay kwanay anga winen a sə walay kwanay. Anga nan, sumor a nà, azla a kwanay à cəved a Mbərom inde â ga nə lele. Gen anan sumor ï zek ahay fok, taren dō lele aya awan, dō mə nahay nga aya awan, dō səkəffe aya awan, aday dō sə munapanaw ahay re. <sup>13</sup> Səmen anan ï zek ahay. Kwa abay awan inde kə slahak anan ù uko inde anà dōwan aya dəp nà, tē pəse zek ahay, anga Bahay a mənuko nà, winen apan a taa pəsek uko anan ines a nukō ahay. <sup>14</sup> Way lele bina maw nà, sənən zek à wulen a kwanay ahay inde. Ata ki gen matanan nà, asan zek i japay kwanay pə kərtek awan, aday mivel a kwanay ahay dukwen, ti ga nə kərtek a re.

<sup>15</sup> Mbəsiken anan mivel a kwanay anà zay a Yesu Almasihu sə varak ikwen ata anga aday â lavan nga anà mivel à kwanay. Mbərom a ngamak ikwen ahay à zay anahan ata inde anga aday kə taren uda zek kərtek awan. Natiya ngəren anan kwa siwa siwa fok. <sup>16</sup> 'Am ana Yesu Almasihu â rah anan mivel a kwanay ahay. Diken anan anan 'am a Mbərom ï zek ahay, men anan zek ï zek ahay tə atətak way ahay tə kəlire mbala ana Mbərom a sə varak ikwen ata awan. Gen ara sə zambad anan Mbərom, tə ara sə həran nga, aday tə ara mbala ana Apasay a Mbərom sə dakak ikwen anan ata awan. Ngəren anan à Mbərom tə ataslay mivel awan. <sup>17</sup> Way a kwanay saa ga ta sa ja fok nà, gen nà, tədə kawa dō a Bahay Yesu ahay, ta sə ngəran apan anà Mbərom Bəbay a kwanay anga Yesu.

*Anjahay su do a Yesu ahay*

<sup>18</sup> Kwanay uwar ahay, dāfen anan apan anà mbaz a kwanay ahay nà lele. Wita nà, way aday tādē do a Yesu ahay ti ga ata awan.

<sup>19</sup> Kwanay mungol ahay, pālen anan uwar a kwanay ahay lele, kâ si gen atan alay bay.

<sup>20</sup> Kwanay gwaslay ahay, bānen anan à 'am wa anà atə bəbay a kwanay tə may a kwanay ahay pə way ahay fok lele. Ata ki gen matanan nà, i zlan à nga anà Bahay a mənuko.

<sup>21</sup> Kwanay bəbay sə gwaslay ahay kutok, kâ si ngərzen pə gwaslay a kwanay ahay bəra bəra bay, bina ti njahay nà slebərbərre.

<sup>22</sup> Kwanay bile ahay ite, dāfen anan apan anà bahay su doh a kwanay ahay lele. Kâ sa dāfen atan apan nà, pə idē a wa aday à zlan atan à nga ata cəna coy bay. Əna dāfen atan apan nà lele tə mivēl kərtek awan, anga kwanay nà, do sə jəjaran à Mbərom ahay. <sup>23</sup> Kwanay apan ki gen nà, mer wura wura fok cəna, gen nə tə mivēl kərtek awan, kawa ki gen anan mer su way anà Bahay a mənuko, bina anà do zənzen a bay. <sup>24</sup> Sənen apan lele, saa varak ikwen magwagway pi mer su way a kwanay ahay nà, zek a Bahay a mənuko awan, i varak uko anan way anahan sə zlapan anan anà do anahan ataya awan. Bahay a kwanay sa gan mer su way ata nà, winen Almasihu. <sup>25</sup> Sənen apan lele asa re, dowan a kâ gak ines nà, Mbərom i gan sariya pə ines anahan ata awan. Bina Mbərom a gəzla do ahay pi zek wa itəbay asanaw!

**4**

<sup>1</sup> Kwanay bahay su doh ahay ite, gen anan nga

anà ßile a kwanay ahay nə lele aday tə cəved awan. Bina kwanay đukwen, kə sənen zle, bahay inde à mburom pa nga a kwanay re asanaw?

*Gen anan amboh à Mbərom aday təren do ma san way aya awan*

<sup>2</sup> Rəzlen anan à nga wa sa gan amboh anà Mbərom ta sə ngəran kwa siwa siwa fok. <sup>3</sup> Gen anan amboh à Mbərom anga manay re. Gen anan amboh anga aday mâ njad cəved sə đakay anan ləbara sa 'am ana Almasihu mi đer ata anà do ahay. Həna manay à dangay nà, anga ləbara sa 'am anahan ata awan. <sup>4</sup> Gen anan amboh à Mbərom nà, anga aday ũ mo zek sə đakay anan 'am anahan anà do ahay cərah lele, kawa abay təde ni đakay anan ata awan.

<sup>5</sup> Gen anan nga anà anjahay a kwanay à mamasl su do sa san Mbərom bay ahay inde ata nà, lele. Kwa siwa cəna, kà sa təmen anan alay a bay, gen nə way lele aya awan. <sup>6</sup> A akad bala a kwanay ahay inde nà, 'am a kwanay ataya fok à ga nə 'am lele aya ma đaf nga awan. Matanan ki sənen sə mbəđahan apan anà do sə cəce 'am ahay fok.

*Aja 'am mədakwidok aya awan*

<sup>7</sup> Mərak a nuku Tikikus i đakak ikwen anan ləbara sə njahay uno à man a anan ata awan. Tikikus nà, winen mərak a mənuko, car uno re, winen do sa ga mer su way a Bahay a mənuko ndekərkərre lele. Manay apan mi gan mer su way anà Mbərom miya awan. <sup>8</sup> Nen apan ni slənak anan ayak nà, anga aday à təkərek ikwen anan ləbara a manay, aday i varak ikwen məgala sə pərahan azar a Mbərom. <sup>9</sup> Tikikus i zlak ayak tə mərak a mənuko Onesimus do sə àga kwanay

awan. Winen nə car a mənuko, aday a ga mer su way a Mbərom nə, ndekərkərre re. Tinen ti đakak ikwen anan way sə təra à man a manay a anan ataya fok. <sup>10</sup> Matanan Aristarkus, dōwan a manay à dangay həna miya ata kà jak ikwen ayak 'am. Aday Markus, wan a mərbay ana Barnabas kà jak ikwen ayak 'am. Kə sənən apan zle, na jak ikwen lele, Markus kà sak a dəzlek ayak nə, təmihen anan lele. <sup>11</sup> Yesu sə dōwan inde tə ngaman Yustus re ata, kà jak ikwen ayak 'am. A wulen ana dō su mo zek sa ga mer su way anga bahay a Mbərom ataya nə, Yahuda maza aya ibay, si tinen a maakankən'a ataya, coy. Tinen nə, ta mak uno zek sə vuro məgala í mer su way inde wanahan.

<sup>12</sup> Epafəras kà jak ikwen ayak 'am. Winen nə, dō sə àga kwanay aya re, winen dō sa ga mer su way a Yesu Almasihu cite. Winen apan i rəzlen à nga wa sa gan amboh anà Mbərom pac pac anga kwanay. A gan amboh a Mbərom nə, anga aday kə tərən dō mə jəra aya awan, kə tərən dō ma san nga aya awan aday kə sənən sa ga way ana Mbərom sa gan may fok kutok. <sup>13</sup> Na san pi mer su way anahan sa ga tə mətəndəron ataya zle anga kwanay, anga dō sə Lawdikiya ahay, aday anga dō sə Hirapolis ahay re. Winen nə, ni ra ambar anahan a təte. <sup>14</sup> Lukas car a mənuko doktor ata kà jak ikwen ayak 'am aday Demas đukwen kà jak ikwen ayak 'am re.

<sup>15</sup> Matanan jen anan 'am anà mərak à mənuko ahay à Lawdikiya ataya awan. Jen anan 'am anà Nimfa tu dō a Yesu ahay sa taa halay nga àga winen ataya awan. <sup>16</sup> Derewel a anan nə, jingen anan àga kwanay, aday kə slənen atan anan ayak anà dō sə egliz sə Lawdikiya ahay tē jinge anan re. Aday

ɔferewel uno sə vinden anà Lawdikiya ahay ata kà dɔzlek ayak àga kwanay nà, jingen anan ite re.

<sup>17</sup>Jen anan anà Arkipus nà, à demedpi mer su way a Bahay a mənuko sə mbəsakan ata sa ga anan nə lele.

<sup>18</sup>Nen Pol, na jak ikwen ayak 'am. Nə vindek ayak 'am a anan nà, tə alay uno awan. Sənen apan lele re, nen nà, à dangay hwiya.

Natiya Mbərom à gak ikwen sumor anahan.



**A6an 'am wiya awan**  
**New Testament in Mbuko (CM:mqb:Mbuko)**

copyright © 2010 Wycliffe Bible Translators, Inc.

Language: Mbuko

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mbuko

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022  
85377c5a-ee2b-5540-a6b5-8f8a5a729092